

ORDNING FOR

# Forbønn

for borgarleg inngått ekteskap

Den Evangelisk Lutherske Frikyrkja

---

I løpet av handlinga kan ein gje rom for medverknad av ulike slag. Det kan vera medverknad frå festfølget ved enkelte av dei liturgiske ledda, og det kan vera tillegg til handlinga i form av musikk eller høgtlesing, eventuelt kombinert med at ein tenner lys i lysglobe. Blant dei kulturelle innslaga kan ein òg opna for element som understrekar ekteparet sin etniske bakgrunn. Der den eine eller båe ektefolka har ein annan kyrkjeleg tilknytning enn Den Evangelisk Lutherske Frikyrkja, kan ein opna for deltaking frå vedkomande kyrkjesamfunn.

Både når det gjeld medverknad frå andre kyrkjesamfunn og kulturelle innslag, skal ein tilpassa den gudstenestlege karakteren til forbønshandlinga og ikkje bryta med Den Evangelisk Lutherske Frikyrkja sitt trusgrunnlag.

Salmar: Lovsongar til Gud som skapar, Kristus som frelsar og Den heilage ande som rettleiar, bønenerop, lovprisingsvers, forkynnande songar og åndelege viser. Desse vert fyrst og fremst framført av kyrkjelyden i fellesskap, men kan også bli sunge av kor/korgrupper, solistar o.a. Salmen skal understreka den bibelske karakteren i den kyrkjelege handlinga og hjelpa dei framførte i å ta imot Guds ord og vilje.

Innslag som kjem i tillegg til liturgien, kan for eksempel bli plassert etter ledd 8 **Forbøn**.

Der namna skal nemnast, kan ein bruka fullt namn eller fornamn, etter det som er naturleg i det enkelte tilfellet. I spørsmåla under ledd 7 **Framstilling av ekteparet** skal det brukast fullt namn.

## 1 Preludium/Inngang

Musikk til preludium/inngang.

Ekteparet kan ta plass i koret på førehand, eller dei kan gå saman fram til koret og setja seg på plassane sine. Dersom det er ønskjeleg, kan ekteparet, forlovarar, liturg og andre gå inn i kyrkja i prosesjon. Viss ønskjeleg kan brudeparet og liturgen gå sist inn.

Deretter kan høveleg vokal- eller instrumentalmusikk bli framført.

## 2 Inngangssord

Anten **A**

**L** I namnet åt Faderen og Sonen og Den heilage ande.

Eller **B**

**L** Nåde vera med dykk, og fred frå Gud vår Far og Herren Jesus Kristus.

Deretter vert ekteparet og forsamlinga ynskt velkomen med desse eller liknande ord:

**L** Kjære (fullt namn) og (fullt namn), den (dato) inngjekk de ekteskap i (stad). De har kome hit til (namn på kyrkja) fordi de ønskjer kyrkja si forbøn for ekteskapet dykkar. Vi er samla for å gleda oss med dykk og be om velsigning over dykk og heimen dykkar.

Deretter kan liturgen kort seia noko om gudstenesta som følgjer, og eventuelt avslutta slik:

L Takk Herren, for han er god, evig varer hans miskunn.  
Dette er dagen som Herren har gjort; lat oss jubla og gleda oss no!

*Sal 118,1.24*

### **3 Salme**

#### **4 Skriftlesing**

L Ekteskapet er Guds gode ordning.  
Gud har innstifta det til glede og hjelp for mann og kvinne  
og til beste for samfunnet som dei er ein del av.  
Han har ordna det slik at mann og kvinne skal vera eitt,  
slik Kristus og kyrkjelyden er eitt,  
og stadfest dette fellesskapet med si velsigning.  
Ekteskapet er Guds gode gåve.  
Å leva saman som mann og kone  
kallar oss til eit liv i tillit og kjærleik,  
til å ha omsorg for kvarandre og for heimen  
og stå trufast saman livet ut.

Guds ord vitnar om ekteskapet at det er heilagt og ukrenkeleg.

Det står skrive i Første Mosebok:

Og Gud skapte mennesket i sitt bilete, i Guds bilete skapte han det,  
som mann og kvinne skapte han dei. Gud velsigna dei og sa til dei:  
«Ver fruktbare og bli mange, fyll jorda og legg henne under dykk!»  
1 Mos 1,27-28a

Og vår Herre Jesus Kristus seier:

Han svara: «Har de ikkje lese at Skaparen frå opphavet av skapte dei  
som mann og kvinne og sa: ‘ Difor skal mannen forlata far og mor og  
halda fast ved kvinna si, og dei to skal være éin kropp Så er dei ikkje

lenger to; dei er ein kropp. Og det som Gud har bunde saman, det skal ikkje menneske skilja.» *Matt 19,4-6*

I tilfelle der ein eller bae partar har eit brote samliv bak seg, kan følgjande formular brukast dersom bae er samde om det:

**L** Men der Herrens vilje er blitt broten, må ein bøya seg for Gud og seia:

«Dersom du vil gøyma på synd, Herre, kven kan då bli ståande?»  
Guds tilgjeving kan gje oss ein ny start til å leva etter hans heilage vilje.  
Herren gje dykk kraft til det!

**L** Lat oss vidare høyra frå Guds ord.

2-4 av dei følgjande tekstane, minst ein frå kvart av dei to testamenta.  
Skriftlesingane kan lesast av medlemmer av bryllaupsfølget.  
Dei som skal lesa, går samla fram til lesepulsten.

Brudepar og kyrkjelyd sit under lesinga.

|                            |  |
|----------------------------|--|
| Salme 23                   | Joh 15,9-12 [-17]                        |
| Salme 36,6-10              | Rom 8,38-39                              |
| Salme 91,1-2.4.9           | 1 Kor 13 (i sin helhet eller i utdrag)   |
| Salme 100                  | Gal 6,2                                  |
| Salme 103,1-5              | Ef 3,14-21                               |
| Høys 2,8-14.16-17 + 8,6-7a | Ef 5,20-33 (i sin helhet eller i utdrag) |
| Høys 2,9-10a.13b-14        | Fil 2,1-5                                |
| Høys 8,6-7a                | Fil 4,4-8                                |
| Matt 6,25-34               | Kol 3,12b-14                             |
| Matt 7,7-8.12              | Hebr 13,4a                               |
| Matt 7,24-25               | 1 Joh 4,7-12                             |

Den tredje av lesingane frå Høgsongen kan lesast av éin tekstlesar eller av kvinne (I) og mann (II).

I

Høyr, det er kjærasten,  
der kjem han,  
springande over fjell,  
hoppande over haug.  
Kjærasten liknar ein gasell,  
ein ung hjort.  
Der står han bak muren vår.  
Han gløtter inn gjennom vindauga,  
kikkar inn gjennom gitteret.  
Kjærasten tek til orde og seier:

II

Stå opp, mi kjære, mi vakre jente, og kom!  
No er vinteren over,  
regnet er forbi, det er borte.  
Landet blir dekt av blomar.  
Songtida er her,  
turteldua kan høyrast i landet.  
Frukta på fikentreet mognar,  
blomen på vinstokken angar.  
Stå opp, mi kjære, mi vakre jente, og kom!  
Mi due i fjellkløfta,  
i livd under bratte berg,  
lat meg få sjå deg,  
lat meg få høyra røysta di!  
For røysta er mjuk  
og skapnaden vakker.

## I

Kjærasten er min, og eg er hans,  
han som gjeter mellom liljene.  
Heilt til dagen blæs skuggane bort,  
spring som gasellen, kjærasten min, som ein ung hjort  
over kløfter og fjell!

## I/II

Set meg som eit segl på hjartet ditt,  
eit stempel på armen din!  
For kjærleiken er sterk som døden,  
lidenskapen ubøyeleg som dødsriket.  
Han brenn som logande eld,  
ein Herrens loge.  
Veldige vatn sløkkjer ikkje kjærleiken,  
elvar skyl han ikkje bort.  
*Høgs 2,8-14.16-17 + 8,6-7a*

Siste lesing vert avslutta med:  
«Slik lyder Herrens ord.»

Her kan følgje

### **5 Salme**

eller vokal- eller instrumentalmusikk.

### **6 Tale**

Liturgen held ein tale over eit av dei skriftorda som er lese under ledd  
4 eller over ein annan høveleg tekst.

## 7 Framstilling av ekteparet

Ekteparet går saman fram (til alteret).

Anten **A**

**L** For offentleg styremakt har de lova å leva saman i ekteskap. Denne lovnaden vil seia at de skal vera eitt og halda trufast saman i gode og vonde dagar inntil døden skil dykk.

Etter dykkar ønskje vil vi i dag be for dykk og stilla ekteskapet og heimen dykkar inn under Guds velsiging.

Eller **B**

**L** (Mannen og kvinna sine fulle namn utan tittel), de har for offentleg styremakt lova å leva saman i ekteskap.

For Gud vår Skapars andlet spør eg deg, (mannen sitt namn): Held du fast ved lovnaden om å elska og æra (kvinna sitt namn) og halda trufast saman i gode og vonde dagar inntil døden skil dykk?

**Mannen:** Ja.

**L** For Gud vår Skapars andlet spør eg deg, (kvinna sitt namn): Held du fast ved lovnaden om å elska og æra (mannen sitt namn) og halda trufast saman i gode og vonde dagar inntil døden skil dykk?

**Kvinna:** Ja.

**L** Då vi no har høyrte lovnadene dykkar om truskap, vil vi be for dykk og stilla ekteskapet og heimen dykkar inn under Guds velsiging.

## 8 Forbøn

Ekteparet knelar.

Liturgen bed med handspålegging ei av følgjande bøner, som blir avslutta med Herrens bøn.

Eventuelt kan også andre i følgjet ta del i forbøna med handspålegging.

I

Anten **A**

**L** Miskunnsame Gud og Far, du som har innstifta ekteskapet og velsigna mann og kvinne, vi bed deg: Lat di velsigning kvila over (namn) og (namn) som her knelar for ditt andlet. Fyll dei med din kjærleik og bygg heimen deira i fred. Sjå til dei i nåde, og styrk dei med din Ande, så dei i gode og vonde dagar set si lit til deg, held trufast saman og hjelper kvarandre fram mot det evige livet.

Eller **B**

**L** Gode Gud, vi takkar deg for (namn) og (namn) og for kjærleiken deira til kvarandre. Velsign livet deira som ektefolk.

Hjelp dei å halda den lovnaden dei har gjeve kvarandre, så ekteskap deira kan bli fylt av tillit, omsorg og glede.

Gjev dei evne og vilje til å byggja heimen sin i fred, så det blir ein stad der [born kan veksa opp i tryggleik og] familie og venner kan finna fellesskap.

Du som er vegen, sanninga og livet, lat dei få vandra i di sanning. Du som tilgjev og lækjer, hjelp dei å tilgje kvarandre. Du som er kjærleiken si kjelde, gjev dei og alle ektefolk å veksa og mognast i kjærleik.



## II

Her kan ein leggja til ei fri bøn , eventuelt kombinert med lystenning.  
Eller kyrkjelyden kan syngja ei bønesalme (medan ekteparet knelar).

## III

Forbøna blir alltid avslutta med Herrens bøn.

**L** Lat oss saman be Herrens bøn.

**A** Vår Far i himmelen!

Lat namnet ditt helgast.

Lat riket ditt koma.

Lat viljen din råda på jorda slik som i himmelen.

Gjev oss i dag vårt daglege brød,

og tilgjev oss vår skuld,

slik vi òg tilgjev våre skuldnarar.

Og lat oss ikke koma i freisting,

Men frels oss frå det vonde.

For riket er ditt,

og makta og æra i all æve.

Amen.

**L** Herren velsigne deg og vare deg.

Herren la sitt andlet lysa over deg og vere deg nådig.

Herren lyfte sitt andlet mot deg og gje deg fred. X

**M** Amen.

Ekteparet reiser seg.

Her kan følgja

## **9 Musikk/symbolhandlingar**

Deltakarar i festfølget og andre kan ta del med musikk, høgtlesing eller andre innslag.

For eksempel kan denne symbolhandlinga nyttast:

- Som eit teikn på den nye einskapen bed liturgen ekteparet syna at ei ny fase i livet har teke til.
- Mann og kone går til kvar sin kant av altaret/koret og tek imot eit lys frå ein av dei næraste i sin familie (far, mor eller ein annan som er næraste pårørande). Familiemedlemen tenner lyset.
- Når lyset er motteke, går mann og kone sakte, frå kvar si side, med lysa tente mot eit tredje lys (større enn dei to andre og dermed litt annleis) som er plassert i ein stake midt framfor altaret/koret (eller framme i midten av romet).
- Mann og kone tenner så, samtidig, dette tredje lyset med kvart sitt lys. Deretter sløkkjer dei det mindre lyset dei tok imot, rekkjer det til forlovarane og grip båe om det tredje lyset og lyfter det opp, vende mot kyrkjelyden, for så å setja det i staken att.
- På denne måten blir det eit symbol på at dei to er eitt.

## **10 Salme**

### **11 Velsigning**

L Vend mot kyrkjelyden

Tak imot velsigninga.

Kyrkjelyden reiser seg.

**L** Herren Jesu Kristi nåde,  
Guds kjærleik  
og samfunnet med Den heilage ande  
vera med dykk alle. †

**M** Amen.

Her kan det vera vokal- eller instrumentalmusikk.

## **12 Postludium/Utgang**

Musikk til utgang. Ekteparet går saman ut av kyrkja.